

## ALAHADY VII - PAKA - TAONA A



### ***NY FIAINANA MANDRAKIZAY DIA NY MAHALALA AN'ANDRIAMANITRA***

Ry Kristianina havana, mbola ao anatin'ny hafalian'ny Paka isika izao na dia mbola miatrika an'ity fahavalo tsy hita maso ity izay tena manapotika tokoa satria zary “fahavalo avokoa izay manodidina”. Miseho izany satria tsy afaka mifandray tanana ny rehetra..... Matoky anefa isika fa nandresy tokoa I Jesoa ka hopotehin'ny Fanahy Masina io “fahavalo tsy hita maso” io. Tamin'ny Alakamisy lasa teo isika no nankalaza ny fiakaran'i Jesoa any an-danitra izany hoe nankalaza fa nisy havantsika tafita ary dia mbola anatin'ny hafalian'izany isika amin'izao Alahady fahafiton'ny Paka izao. Efa manampy antsika hiroso bebe kokoa amin'ny fandalinana an'i Jesoa Mpiara-belona izany fibanjinana an'I Jesoa tafita izany. Tena niavaka tokoa ho antsika teto amin'ny diosezy ny fankalazana ny Fiakaran'I Jesoa satria nankalazana ny fanamasinana ny Menaka Masina sy ny Fanavaozana ny Tokim-panompoana nataon'ny

Vakiteny I : Asa 1. 12-14  
Tononkira : Sal. 65,  
Vakiteny II : 1 Pi. 4, 13-16  
Evanjely : Jo. 17, 1-11a

pretra eto amin'ny diosezintsika. Zava-dehibe izany satria azo lazaina fa dingana vaovao indray amin'ny maha EOY Misionera antsika manorina ETA ka mahatonga antsika tokoa ho Tabernakla Velona eo anivon'ny fiaraha-monina. Tsy entina hipoerapoerana

izany fa fahafoizana sy fanompoana isika. Tsy fampandrian-tany na herim-pamoretana no maha EOY misionera antsika fa vita batemy irahina hizara famindram-po hamafy fanantenana sy fiadanana amin'ny mpiara-belona. Tsy iza tokoa i Jesoa amin'izao vanimpotoana iainantsika izao fa isika Kristianina, isika no Jesoa mpiara-belona amin'ireo manodidina -antsika.

Ny tenin'Andriamanitra androany dia mampianatra antsika fa ny tena fiainana dia ny fiainana mandrakizay izany hoe fiainana mitondra ny hasambarana. Ny fiainana misy ny fiombonana amin'i Jesoa ilay nandresy ka antenaintsika fa hiaraka Aminy koa isika dia tsy inona fa ny mahalala an'Andriamanitra.

Tsy mahagaga àry raha lazaina fa io fiainana mandrakizay io dia manomboka izao, izany no mahatonga antsika ho Jesoa mpiara-belona amin'ny manodidina antsika. Manamafy ny ezaka ataontsika mameno ireo sajoa saota, siny enina fa indrindra amin'izao fotoana mihiboka hiomanantsika hankalazana ny Pantekoty mba ho Pantekôty vaovao ho antsika tokoa na dia eo aza ity areti-mandoza ity. Pantekôty vaovao tokoa izy raha potika ireo fahotana manimba ny fifandraisantsika amin'ny zava-boaary, amin'ny fifandraisantsika samy isika ary ny fifandraisana amin'Andriamanitra ka tanteraka ilay hafatr'I Papa ao amin'ny Laudato Sì izay tsaroana niany ny faha-5 taona : “fivelaranan'ny olona manontolo sy ny olondrehetra olondrehetra” (développement integral de l'homme) noho ny herin'ny afon'ny Fanahy Masina.

Matetika anefa isika mametraka fanontaniana raha mahita ny zava-misy ary fantantsika fa sarotra ny fampitrahaofana ny finoana sy fiainana andavanandro izany hoe ilay fiainana mandrakizay satria ao tokoa no tanteraka ny finoana. Sarotra ny mameno ireo sajoa enina : mivavaka, mandalina ny finoana, manompo, mandray an-tanana, mivory, mankalaza ... Ny Evanjely androany dia manampy antsika handalina ny fototry ny fiainana maha Kristianina antsika mpanara-dia an'i Kristy, fiainan'i Kristy no fiainantsika izay midika fa mahay mampitraotra ny finoana sy ny fiainana andavanandro isika. Sady Kristianina isika no olombelona tahaka ny olombelona rehetra, mitafy nofo aman-drà, miloloha lanitra ka mety ho lena, mandia tany ka mety ho solafaka. Kanefa antsoina isika ho amin'ny hasambarana. Tsy vôlekasiona ny hijaly fa noharian'Andriamanitra amin'ny hasambarana isika. Tsy izao covid 19 izao no fiainana fa fiainana mahazo an'Andriamanitra

### **Ahoana àry no ahafahantsika mameno ireo siny enina ireo ka hahatonga antsika hahay hampifandray ny finoana sy ny fiainana ?**

Jesoa milaza ao amin'ny Evanjely androany hoe : *“Raiko ô, tonga ny fotoana: omeo voninahitra ny Zanakao, mba hanomezan'ny Zanaka voninahitra Anao, fa efa nomenao fahefana amin'ny nofo rehetra Izy, mba hanomezany ny fiainana mandrakizay an'izay rehetra nomenao Azy. Ary izao no fiainana mandrakizay, dia ny mahalala Anao hany Andriamanitra marina sy i Jesoa Kristy izay nirahinao ”*

Ahoana no hahazana hampifandray ny voninahitra sy ny fijaliana, hampifandray ny fahafatesana sy ny fiainana, hampifandray ny haratsiana sy ny hafaliana, ny hasambarana sy ny fahoriana fa indrindra raha hita tsapain-tanana amin'izao Coronavirus izao na dia “fahavalo tsy hita maso” aza izy.... Izany anefa ny zava-misy eo amin'ny fiainantsika andavanandro ary miatrika an'ireo rehetra ireo isika amin'izao. Tsy anjely isika ary tsy

sanatria koa demony fa olombelona antsoina ho zanak'Andriamanitra, izany no foto-pampianarana androany Alahady fahafiton' ny Paka izao.

Ny Fanahy masina no "trait d'union" sy lakile hahafahantsika mampivondrona ireo fahasarotam-piainana andavanandro iainantsika ireo. Sarotra amintsika ny handray ny hafaliana sy ny fiadanana ao amin'i Jesoa, sarotra amintsika amin'izao fiainana izao ny hiditra amin'ny voninahitr'Andriamanitra ka ny lakile mampifandray an'ireo dia ny Fanahy masina ary izany no andrandraintsika amin'ny fankalazana ny Pantekôty.

Raha mandray ny Fanahy masina isika dia mandray ny fanomezana fiton'ny Fanahy masina izay averimberina amintsika rehefa mandray ny sakramenta ny konfirmasio. Ny fanomezan'ny Fanahy masina arotsak'Andriamanitra amintsika mba hanavao ny fiainantsika ka tsy ho revo amin'ny gôdran'n'ny fahotana isika, tsy hirefarefa amin'ny tany na dia olombelona mpanota aza fa afaka mijoro manavao ny fiainantsika. Havaozin'Andriamanitra tokoa ny fiainantsika noho ny fanomezany ny Fanahy masina izay raisintsika. Tsy ny "gôdran'ny Coronavirus" no hanapotika ny fiainantsika fa omen'Andriamanitra ny "autoroute-ny" Fanahy Masina isika mba ho tody soa aman-tsara amin'izay fiainanan'ny Zanak'Andriamanitra izany hoe ho EOVI MISIONERA tokoa ka manorina ETA araky ny fampianaran'i Papa ao amin'ny Laudate Si ka zary lanitra vao sy tany vao ny fiainantsika

Ny vakiteny voalohany (*Asa 1, 12-14*) manambara fa niray saina izy rehetra ary naharitra nivavaka, izany ny maha Eglizy ny Eglizy. Ary io faharetana mivavaka no angatahana amintsika amin'ny Sajoa voalohany... Manomboka any amin'ny fianakaviana ny Eglizy ka hatramin'ny diosezy, Eglizy ny Eglizy raha mivavaka, raha miray saina, izany ny asan'ireny filan-kevitra misy amin'ny eglizy Iraka tsiraikiraiky sy ny diosezintsika ireny, antenaintsika hiray saina sy haharitra mivavaka izy ireo mba hiasa araka ny fanomezan'ny Fanahy masin'Andriamanitra.

- Eglizy ny Eglizy raha mandalina ny finoana : Sajoa faharoa

Izany no ezaka ataontsika eto amin'ny diosezy amin'izao taonan'ny Misiona izao. Ezaka ataontsika ny nametraka ireny centre isan-karazany eto amin'ny diosezintsika ireny dia ny Centre polyvalent Lucien Botovasoa, Centre St Augustin, ny namoaka ny katesizy izay hianarantsika eto amin'ny diosezy ary ny nanolotra antsika ny taratasy mikasika ny katekista. Irina ny hisian'ny katesizy ho an'ireo nahavita Kôfirmasio mba hiroso amin'ny fiainana matotra kokoa ka handalanan'izy ireo manokana ny Sakramenta ny Mariazy, ny fiainana voatokana, ny sakramentan'ny filaharana. Tsy mbola misy katesizy mikasika ireo.

Ahoana àry ny fomba hivelomana an'izany rehetra izany ?.

- Eglizy ny Eglizy raha manompo

Tsy maintsy mivelona sy miditra amin'ny vaomiera isan-karazany misy ao anatin'ny eglizy fiombonana, fototra, iraka isika mba hahafahantsika manompo ny hafa. Ao anatin'ny fikambanana sy firohotana arakaraky ny karisman'ny tsirairay na ny harem-panahin'ny tsirairay no manampy antsika miaina sy mijoro ho vavolombelona eo amin'ny manodidina antsika.

- Eglizy ny Eglizy raha mandray an-tànana

Izany ny vokatry ny Paka, ao amintsika ny Fanahin'Andriamanitra, Izy no hahazantsika mampitraotra ny finoana sy ny fiainana andavanandro. Hahay mampiaraka ny voninahitra sy ny fijaliana, ny fahafatesana sy ny fiainana isika raha ao amintsika ny lakile.

Raha sokafintsika ny fonsika ka mandray ny Fanahy masina isika dia ho ilay fiainana ambaran'i Jesoa, fahalalana an'Andriamanitra ny fiainana mandrakizay, ho ilay fiainana misy an'Andriamanitra, ho ilay fiainana velomin'ny finoana ary tsilovin'ny Fanahy masina ny fiainantsika ka hahalala an'Andriamanitra tokoa isika.

Tsy an-kandrina fotsiny izany, tsy ny fahaizana ny "credo" fotsiny ny fahalalana an'Andriamanitra fa mahalala Azy isika raha ny mason'Andriamanitra no hijerentsika an'izao tontolo izao, raha ny fon'Andriamanitra no mitempo ao amintsika, ka ilay tena fitiavana no hifandraisantsika amin'ny manodidina antsika, raha mahafoy isika ary mahafoy ho an'ny eglizy, raha vonona mahafoy ho an'ny namana koa isika. Nolazain'i Papa Ray masina ao amin'ny Ansikilika Laudate Si fa ny namana dia fanomezan'Andriamanitra.

Raha ny vavantsika no midera an'Andriamanitra fa tsy manaratsy ny hafa amin'ny alalan'ny teny ataontsika, raha ny sofintsika mandre ny tenin'Andriamanitra dia ho fantantsika ny anjara toeran'ny Baiboly eo amin'ny fiainantsika.

Raha mifikitra amin'ny hazo fijaliana isika izany hoe raha fintinina izany rehetra izany raha mampiseho fa Kristianina isika. Tsy ny famantarana ny hazo fijaliana ataontsika eto ivelany fotsiny fa isika mifikitra amin'ny hazo fijaliana ka miara-maty amin'i Kristy amin'ny fahotana **ka** ary dia hiaraka hitsangana Aminy koa.

Hoy i Md Piera amin'ny vakiteny faharoa (1 Pi. 4, 13-16) : *"Ry hava-malala, mifalia arakaraka ny iombonanareo fijaliana amin'i Kristy, mba hanananareo anjara amin'ny fijaliana sy firavoravoana amin'ny andro hisehoan'ny voninahiny. Sambatra ianareo raha tevatevaina noho ny Anaran'i Kristy, fa mitoetra ao aminareo ny Fanahin'ny voninahitra sy ny fahefana, dia ny Fanahin'Andriamanitra. "*

Imbetsaka isika no manontany hoe inona ny hahafantarana fa Kristianina isika izany hoe Jesoa mpiara-belona amin'olona ?

Tsy mitady ho tevatevaina isika ary sanatria tsy manaratsy olona isika fa mahalala an'Andriamanitra ka tsy tia ny demony fa mijoro ho vavolombelona eo anivon'ny fianakaviana, eo anivon'ny fiaraha-monina sy toeram-piasana ary eo anivon'ny sekoly misy antsika hanambara fa i Jesoa no fiainana, i Jesoa no hasambarana. Ny fahaizana miaina ny maha-Kristianina no hahazoana ny tena hasambarana marina.

Ry Jesoa Tompo ô, amin'izao famaramparanana ny fankalazana ny Paka izao dia ambaranao mazava fa ny tena maha-Kristianina anay dia ny fiombonanay Aminao koa enga anie ny Fanahinao masina izay ankalazainay amin'ny Alahady ho avy izao ny fidinany tamin'ny Apôstôly mba hidina aminay koa.

Mivavaka izahay manokana ho an'ny Voatokana izay tokona hanao ny fihaonana isan-taona nefa tsy afaka no ity confinement ity mba ho tena famantarana ny fitiavanao tokoa amin'ny toerana misy azy ireo tsirairay avy anie izy ireo. Enga anie izy ireo hanambara amin'ny fanokanan-tenany fa ao Aminao no hany tena fiainana sy tena hasambarana ka tanteraka sahady ilay nampianaranao anay androany hoe ny mahalala an'Andriamanitra no fiainana mandrakizay. Hitombo fahalalana Anao anie izy ireo mba hampahafantatra amin'ireo manodidina azy.

Izahay Kristianina kosa no “Jesoa velona” eo anivon'izao tontolo izao hanohy ny asa famonjena natombokao, ka enga anie ilay Fanahy fankaherezana, ilay Fanahy mpanazava nalefanao ho eo anivonay mandrakariva mba hahazanay tokoa mampitraotra ny finoana sy ny fiainana andavanandro.

Ao anatin'ny hasivianandro iandrasana ny Fanahy Masina izahay ka enga anie hiova ny fonay ka hibebaka tokoa izahay. Ianao tokoa anie no hanjaka aminay ka hitondra ny fihavananao sy ny fiadananao anie izahay fa tsy izay omen'izao tontolo izao. Hanomboka ny volan'ny Fo Masin'I Jesoa izahay ka haka tahaka ny Fonao masina. Ianao ry Fo Masin'I Jesoa no Mpiaro ny Diosezinay. Matoky anao izahay. Amen

Mompera Arseveka Mgr Benjamin Ramaroson